

le onosai, ae sa ou leiloaina pe sa ou agalelei tele i ai. O lea, sa ou faataitai malosi moni ai mo le silia ma se masina, ma sa papatisoina ai o ia.”

E mamana le agalelei, aemaise lava i se tulaga faaleaiga. Sa faaauau ai lana tusi, “O loo ou taumafai foi ia agalelei atili i le taimi nei ona o loo matou galulue ia faamau i le malumalu i lenei tausaga!”

I le ono tausaga mulimuli ane sa ia tusi mai se isi tusi: “O lea ua [faatoa] valaauina lou toalua ma vaetofiaina o se epikopo [o le matou uarota].”<sup>2</sup>

## VI.

I le tele o mafutaga ma tulaga i le olaga, e tatau lava ona tatou ola faatasi ma nei eseese. I tulaga e taua ai, o lo tatou itu o nei eseese e le tatau ona teenaina pe lafoaia, ae i le avea ai ma soo o Keriso e tatau ona tatou ola filemu faatasi ma isi e le tutusa o tatou tulaga faatauaina pe talia ia aoaoga ia o loo faavaeina ai. O le ata o le faaolataga a le Tama, lea ua tatou iloina i faaaliga faaperofeta, ua tuu ai i tatou i se tulaga faaletino lea e ao ai ona tatou tausia Ana poloaiga. E aofia ai i lena mea le alofa i o tatou tuaoi e eseese aganuu ma talitonuga e pei ona Ia alofa mai ia i tatou. E pei ona aoa mai se perofeta o le Tusi a Mamona, e tatau ona tatou fetatua i luma, ma “se alofa i le Atua ma tagata uma” (2 Nifae 31:20).

E pei ona faigata ona ola ai i faaaitaui o loo siomia ai i tatou, o le poloaiga a le Faaola ia alofa le tasi i le isi e pei ona Ia alofa mai ia i tatou e masalo o lo tatou luitau silisili lea. Ou te tatalo ia tatou malamalama i lenei mea ma saili atu ia ola ai i a tatou mafutaga uma ma gaio-oiga, i le suafa o Iesu Keriso, amene. ■

### FAAMATALAGA

1. Thomas S. Monson, “O Le Alofa—o le Ute lea o le Talalelei,” *Liahona*, Me 2014, 91.
2. Tusi ia Dallin H. Oaks, Ian. 23, 2006, ma Oke. 30, 2012.



Saunia e Elder Neil L. Andersen

○ Le Korama a Aposetolo e Toasefululua

# Iosefa Samita

*Sa filifilia e Iesu Keriso se tamalii paia, se tamalii amiotonu, e taitaiina le Toefuataiga o le atoaga o Lana talalelei. Sa Ia filifilia Iosefa Samita.*

I lana uluai asiasiga i le Perofeta o Iosefa Samita i le 17 o ona tausaga, sa tau atu e se agelu le igoa o Iosefa ma fai atu ia te ia o ia, o Moronae, o se avefeau na auina mai mai le afioaga o le Atua ma e i ai se galuega a le Atua mo ia e fai. Mafaufau i lagona na oo ia Iosefa ina ua tau atu e le agelu ia te ia o lona igoa o le a “tauleleia ma taulegaina i totonu o atunuu uma, ituaiga, ma gagana.”<sup>1</sup> Masalo o le faateia i mata o Iosefa na mafua ai ona toe fai atu Moronae, o le a tauleleia ma taulegaina o ia i atunuu uma.<sup>2</sup>

O le tauleleia lea o Iosefa Samita na faasolosolo lemu mai; ae o le taulegaina na amata lava i lena taimi. Sa tusia e Iosefa, “I le uiga ese moni lava, o le avea o se tama le lauiloa . . . sa mafaufauina ua lava lona taua e amanaia ai . . . sauaga sili ona malosi.”<sup>3</sup>

E ui sa tuputupu ae le alofa mo Iosefa, ae sa faapena foi ma le le fiafia. I le 38 o ona tausaga, sa fasiotia ai o ia e tagata leaga e 150 na vali uma o latou foliga.<sup>4</sup> E ui na faafuasei ona iu le soifua o le Perofeta, ae o le tauleleia ma le taulegaina o Iosefa faatoa amata.

E tatau ea ona faateia i tatou i le taulegaina o ia? Sa ta’ua le Aposetolo o Paulo o se vale.<sup>5</sup> O lo tatou Faaola Pele, le Alo o le Atua, sa faailogaina o

se tagata faaloloto, inu uaina, ma ua i ai le temoni.<sup>6</sup>

Sa tau atu e le Alii ia Iosefa lona taunuuga:

“O le a fesilisili tuluiga o le lalolagi i lou igoa, ma o le a fai oe ma tauemuga a tagata valelea, ma o le a ‘atigu seoli e faasaga ia te oe;

“Ao e loto mama, . . . e atama-mai, . . . ma e amiomama, o le a saili . . . faamanuiga mai lou lima e le aunoa.”<sup>7</sup>

Aisea e faataga ai e le Alii le taulegaina e tutupu faatasi ma le lelei? O le tasi mafuaaga o le tetee i mea a le Atua e auina atu ai ē saili i le upumoni i o latou tulivae mo ni tali.<sup>8</sup>

O Iosefa Samita o le perofeta o le Toefuataiga. Na amata lana galuega faaleagaga i le faaali atu o le Tama ma le Alo, sosoo ai ma le tele o asiasiga faalelagi. Sa avea o ia ma meafaigaluega i aao o le Atua i le aumaia o tusitusiga paia, aoaoga faavae na leiloloa, ma le toefuataiga o le perisitua. O le taua o le galuega a Iosefa na manaomia ai le sili atu nai lo o ni mafauauga atamai; e manaomia ai lo tatou, faapei o Iosefa, “ole atu i le Atua.”<sup>9</sup> O fesili faaleagaga e talafeagai ma tali faaleagaga mai le Atua.

O le toatele o i latou o e le amanaiaina le galuega o le Toefuataiga e

le talitonu faapea o loo talanoa mai tagata faalelagi i tagata i le fogaeleele. Ua latou fai mai e le mafai ona auina mai e se agelu ni papatusi auro, ma faaliliuina i le mana o le Atua. Mai lena le talitonu, sa vave ai lava ona latou teenaina le molimau a Iosefa, ma o le mea e leaga ai, o nisi sa latou tautino ai e faamaasiasi le Perofeta ma tauleagaina lona tagata.

Tatou te matua faanoanoa lava pe afai e aluese mai se tasi sa faaaloalo ia Iosefa mai i ona talitonuga maumautu sa i ai ae faitio i le Perofeta.<sup>10</sup>

“O le suesue i le Ekalesia . . . e ala atu i mata a ona tagata pepelo,” sa saunoa mai ai Elder Neal A. Maxwell, e pei lava o le “faatalanoaina o Iuta ina ia malamalama ia Iesu. O tagata pepelo e masani lava ona latou tau mai ia i tatou nisi mea e uiga ia i latou nai lo le mea lea ua latou o ese mai ai.”<sup>11</sup>

Na fetalai mai Iesu, “Ia outou faamaunua atu i e ua fetuu mai ia te outou, . . . ma tatalo mo e ua tuuai fua mai ma faasaua mai ia te outou.”<sup>12</sup> Sei o tatou agalelei atu ia i latou o loo faitioina Iosefa Samita, ma iloa i o tatou lava loto o ia o se perofeta a le Atua ma maua le mafanafana e faapea o nei mea uma ua leva ona muai tau mai e Moronae.

E tatau faapefea ona tatou tali atu i se tagata sailiili faamaoni o le e popole i manatu le lelei sa ia faalogo pe faitau i ai e uiga i le Perofeta o Iosefa Samita? O le mea moni, tatou te talisapaia pea e le aunoa fesili faamaoni ma taua.

O fesili e uiga i le tulaga faaletagata o Iosefa, lea ou te fia faasoa atu ai ni upu a le faitau afe o e sa iloa patino o ia ma o e sa tuuina atu o latou ola mo le galuega lea sa ia fesoasoani e faatulaga. O Ioane Teila, lea e faafa ona fanaina e tagata leaga ia na fasiotia Iosefa, sa tautino mulimuli mai: “Ou te tautino atu i luma o le Atua, agelu, ma tagata, o [Iosefa] o se tagata lelei,



mamalu, ma le amioatua— . . . [ma] o ona uiga patino na faaalai i tagata lautele e mama atoatoa—ma sa soifua ma ola o se tagata o le Atua.”<sup>13</sup>

Atonu tatou te faamanatu atu i le tagata suesue faamaoni o faamatalaga o loo i le Initoneti e le o faamamaeseina ai ia faamatalaga le “sa’o”. O nisi faamatalaga, e tusa lava po o le a le faatalitonuina, e le moni lava.

I tausaga ua mavae sa ou faitau ai i se tusiga i le mekasini o le *Time* lea sa lipotia mai ai le mauaina o se tusi, masalo sa tusia e Matini Harisi, lea na feteenai ma le tala a Iosefa Samita e uiga i le mauaina o papatusi o le Tusi a Mamona.<sup>14</sup>

Sa tuua e nisi tagata le Ekalesia ona o lenei tusiga.<sup>15</sup>

O le mea e faanoanoa ai, sa vave tele ona latou o ese. I nai masina mulimuli ane na maua ai e tagata atamamai (ma sa tautino mai lava le tagata tau-faasese) e matua pepelo lava le tusi.<sup>16</sup> Atonu e mafai ona e fesiligia ma le iloa mea e te faalogo i ai i luga o talafou, ae e le tatau lava ona e masalosalo i le molimau a perofeta a le Atua.

Atonu e mafai ona tatou faamanatu atu i le tagata suesue faamaoni e faapea o nisi o faamatalaga e uiga ia Iosefa, e ui e moni, ae atonu o loo ono matua ese lava le talaaga i lena taimi ma le tulaga.

Sa faailoa mai e Elder Russell M. Nelson le manatu lenei. Sa ia saunoa mai: “Sa ou galue o se faufautua i le malo o le Iunaita Setete i lona Nofoga Autu o le Malo mo le Faaititia o Faamai i Atlanta, Georgia. I se tasi taimi a o faatalitali se taavale laupasese ou te alu ai i le malae vaalele ina ua uma le matou fonotaga, sa ou fālōlō i luga o le mutia ina ia mitiia sina sulu o le la a o lei toe foi atu i le tau malulu o Iuta. . . . Sa ou mauaina mulimuli ane se ata mai le meli na pueina e se tagata pueata e faaaoaga ai se meapueata pue mamao, lea na maua ai le taimi o ou malolo ai i luga o le mutia. I lalo ifo sa i ai le faaupuga, ‘Faufautua a le Malo i le Nofoga Autu o le Malo.’ Na sa’o le ata, na sa’o le faaupuga, ae sa faaaoaga le mea moni ina ia aumaia ai se lagona sese.”<sup>17</sup> Tatou te lafoaia se mea ua tatou iloa e moni ona o se mea tatou te le o malamalama i ai.

E mafai ona tatou faamanatu atu i le tagata suesue faamaoni sa le na o Iosefa na i ai i le taimi o le asiasiga a agelu.

Sa tusia e molimau o le Tusi a Mamona: “Matou te tautino atu i upu faamaoni, sa afio mai se agelu a le Atua mai le lagi, sa . . . matou vaai ma iloa ai papatusi.”<sup>18</sup> E mafai foi ona tatou sii atu le tele o isi mau.<sup>19</sup>

E tatau ona vaai le tagata suesue faamaoni i le faasalalau atu o le talalelei toefuataina o se fua o le galuega a le Alii e ala mai le Perofeta.

Ua silia nei ma le 29,000 faalapotopotoga ma le 88,000 faifeautalai o loo aoao atua le talalelei i le salafa o le lalolagi. E faitau miliona le Au Paia o Aso e Gata Ai o loo saili ia mulimuli ia Iesu Keriso, ola i ni olaga faamamaluina, tausia e matitiva, ma tuu atu o latou taimi ma taleni e fesoasoani ai i isi.

Sa fetalai mai Iesu:

“E le mafai i le lauu lelei ona fua



**Faamasani e fetuunai lau oe lava mea manava okesene faaleagaga ina ia e saunia ai e fesoasoani atu i isi o e o sailia le mea moni.**

mai i fua leaga, e le mafai foi i le laau leaga ona fua mai i fua lelei. . . .

“ . . . O lea foi tou te iloa ai i latou i o latou fua.”<sup>20</sup>

O nei faamatalaga e faatalitonuina [le tagata], ae e le tataui i le tagata sue-sue faamaoni ona faalagolago atoatoa i ai e faamalie ai lana sailiiliga mo le mea moni.

E manaomia e tagata talitonu taitasi se faamaoniga faaleagaga e uiga i le misiona paia ma le ituaiga tagata e i ai le Perofeta o Iosefa Samita. E moni lenei mea mo augatupulaga uma. O fesili faaleagaga e talafeagai i ai tali faaleagaga mai le Atua.

Talu ai nei a o ou i ai i le Talafatai i Sasae o le Iunaite Setete, sa talanoa mai ai se faifeautalai ua maea lana misiona e uiga i se uo ua amata ona le mautonu i faamatalaga sa ia mauaina e uiga i le Perofeta o Iosefa Samita. Sa la talanoa i le tele o taimi, ma sa foliga mai ua i ai foi ni masalosologa o le faifeautalai foi ia e mafua mai i a la talanoaga.

E ui sa ou faamoemoe ina ia mafai ona ia faamalosi lana uo, ae sa ou lagona le popole mo lana lava ia molimau. Uso e ma tuafafine, ou te fia tuuina atu ia te outou se lapataiga: e leai sou aoga i isi pe afai e le o mautu lou foi faatuatua.

O nai vaiaso ua tea sa ou lele ai i se vaalele mo Amerika i Saute. Sa faataulai atu e le teine o le vaalele lo matou gauai i se vitio mo le saogalemua. “E

ono le tupu,” sa lapataia ai i matou, “ae afai e suia le malosi o le ea i totonu o le vaalele, o le a matala mai puipui i luga ae o lou nofoa, e faailoa mai ai le mea manava okesene. Afai e tupu lenei mea, aapa atu i luga ma toso mai le mea manava ia te oe. Tuu le mea manava i lou isu ma lou fofoga. Faamaulu le manoa memei i luga o lou ulu ma fetuunai le mea manava pe a manaomia.” Ona sau lea o le lapataiga lenei: “Ia faamautinoa e faamaulu muamua lau oe lava mea manava ae e te lei fesoasoani atu i se isi.”

O manatu faaaliga le lelei e uiga i le Perofeta o Iosefa Samita o le a faateleina a o tatou agai atu i luma i le Afio Mai Faalua o le Faaola. O faamatalaga taufaasese ma tala pepelo maaleale o le a le faaitiitia. O le a i ai tagata o le aiga ma uo o le a manaomiaina lau fesoasoani. O le taimi lenei e fetuunai ai lau oe lava mea manava okesene faaleagaga ina ia e saunia e fesoasoani atu i isi o e o sailia le mea moni.<sup>21</sup>

E mafai ona eseese tulaga e oo mai ai ia i tatou taitoatasi se molimau i le Perofeta o Iosefa Samita. Atonu e oo mai a o e tootuli e tatalo, ole atu i le Atua ina ia faamaonia mai o ia o se perofeta moni. E ono oo mai a o e

faitau i le tala a le Perofeta e uiga i le Uluai Faaaliga. E mafai ona totoina se molimau i lou agaga a o e faitauina pea lava pea le Tusi a Mamona. E mafai ona oo mai a o e tuuina atu lau lava molimau e uiga i le Perofeta pe a o e tu i le malumalu ma iloina ua toefuatai mai i le lalolagi le mana o faamauga e ala mai ia Iosefa Samita.<sup>22</sup> O le faatuatua ma le loto faamaoni, o le a faamalosi ai lau molimau i le Perofeta o Iosefa Samita. O le faifai pea o le taaalo i paluni vai i mea o loo e fiafia e fai atonu e te susu ai i nisi taimi, ae e matua le manaomia lava ona tapeina ai le musaesae o lou faatuatua.

Mo le autalavou o loo faalogologo mai i lenei aso pe o faitauina nei upu i aso o i luma, ou te tuuina atu se lui faapitoa: Ia maua sau oe lava molimau e uiga i le Perofeta o Iosefa Samita. Tuu atu lou leo e fesoasoani i le faataunuuna o upu faavaloga a Moronae ina ia tautala i upu lelei e uiga i le Perofeta. O manatu nei e lua: Muamua, saili ni mau i le Tusi a Mamona e te lagona ma iloa e matuai moni lava. Ona faasoa atu lea i le aiga ma uo i le afiafi faaleaiga, seminare, ma a outou vasega o Alii ma Tamaitai Talavou, faailoa atu o Iosefa sa avea ma se meafaigaluega i aao o le Atua. Ma

**O le Molimau a le Perofeta o Iosefa Samita le ua i ai taimi nei i gagana e 158.**



le isi, faitau le molimau a le Perofeta o Iosefa Samita i le Penina Tau Tele po o i totonu o lenei tusitaulima, lea ua maua i le 158 gagana. E mafai ona e mauaina i luga o le initoneti i le LDS.org po o faifeautalai. O le molimau lenei a Iosefa e uiga i le mea tonu lava na tupu. Faitau soo i ai. Mafaufau e pue le molimau a Iosefa Samita i lou lava leo, faalogologo soo i ai, ma faasoatu ma au uo. O le faalogologo i le molimau a le Perofeta i lou lava leo o le a fesoasoani e aumaia le molimau o e sailia.

O loo i ai ni aso sili ma matagofie o i luma atu. Sa saunoa mai Peresitene Thomas S. Monson: “O lenei galuega sili . . . o le a faaauau pea ona agai i luma, e suia ma faamanuiaina ai olaga. . . . E leai se malosiaga i le lalolagi atoa e mafai ona taofia le galuega a le Atua. Po o le a lava le mea e oo mai, o le a agai pea i luma lenei galuega tele.”<sup>23</sup>

Ou te tuu atu lau molimau o Iesu o le Keriso, lo tatou Faaola ma le Togiola. Sa Ia filifilia se tamalii paia, se tamalii amiotonu, e taitaiina le Toefua-taiga o le atoaga o Lana talalelei. Sa Ia filifilia Iosefa Samita.

Ou te molimau atu o Iosefa Samita sa avea o se tamalii faamaoni ma amiomama, o se soo o le Alii o Iesu Keriso. Na faaali le Atua le Tama ma Lona Alo, o Iesu Keriso ia te ia. Sa ia faaliliuina le Tusi a Mamona e ala i le meaalofo ma le mana o le Atua.

A tatou feoti, o le a manino lo tatou malamalama i le valaauga paia ma le misiona paia a le Perofeta o Iosefa Samita. I lena aso e le o toe mamao, o oe ma au ma le “tele e toe vaai ia ‘Uso Iosefa’.”<sup>24</sup> I le suafa o Iesu Keriso, amene. ■

#### FAAMATALAGA

1. Iosefa Samita—Talafaasolopito 1:33.
2. Tagai Iosefa Samita—Talafaasolopito 1:29–46.
3. Iosefa Samita—Talafaasolopito 1:23.
4. Tagai Mataupu Faavae ma Feagaiga 135:1.
5. Tagai Galuega 26:24.

6. Tagai Mataio 11:19; Ioane 10:20.
7. Mataupu Faavae ma Feagaiga 122:1–2.
8. Sa saunoa mai Peresitene Dieter F. Uchtdorf: “Muamua e masalosalo i ou masalosologa ae e te lei masalosalo i lou faatuatua. Ia le tatau lava ona tatou faatagaina le masalosalo e faapagotaina i tatou ma taofia ai i tatou mai le alofa paia, filemu, ma meaalofo ia e oo mai e ala i le faatuatua i le Alii o Iesu Keriso” (“Sau, Auai Faatasi ma i Matou,” *Liahona*, Nov. 2013, 23). Saunoa mai Elder Jeffrey R. Holland: “O se galuega paia lenei o loo faagasolo faatasi ai ma le anoanoai o faamanuiaga o loo vaai i soo se itu, o le mea lea faamolemole aua nei soona popole pe afai e tulai mai faafitauli e ao ona suesue, malamalama i ai, ma foia. O le a tulai mai lava. *I lenei Ekalesia, o le mea ua tatou iloa o le a sili atu ona taua i taimi uma nai lo mea tatou te le o iloa*” (“Le Alii e, Ua Ou Faatuatua,” *Liahona*, Me 2013, 94).
9. Iakopo 1:5; tagai foi Iosefa Samita—Talafaasolopito 1:11–13.
10. Na toe manatua e Daniel Tyler: “Na ma asiasi atu [i le Perofeta] ma Uso Isaac Behunin i lona fale. O ona sauaga na avea ma autu o talanoaga. Na ia tau maia le tele o tala sese, le fetauai ma feteenai na faia e le au liliuese. . . . Na ia tau mai foi o le toatele o tagata fai tofi. . . . na naunau e faaumatia lona ola ina ua molia o ia, na faaoliga e au mai ia te ia ma fia faamasani ia te ia. . . . “. . . na faapea atu Uso Behunin: ‘Afai ou te tuua lenei Ekalesia ou te le faia e pei ona faia e na tagata: ou te alu i se nofoaga tuufua e lei faalogoina ai se tala e uiga i le faa-Mamona, ou te faamautu ai, ma o le a le iloa lava e se isi ou te iloa ina se mea e tasi e uiga i ai.’  
“Na tali atu [Iosefa] i le taimi lava lena: ‘Uso Behunin, e te le iloa le mea e te faia. E leai se masalosalo na faapena foi ona manatu nei alii e pei o oe. Ae e te le i auai i lenei Ekalesia na e tu i le va o le lelei ma le leaga. . . . Ina ua e auai i lenei Ekalesia ua e ioe e te auuina i le Atua. Ina ua e faia lena mea sa e tuua le va o le lelei ma le leaga, ma e le mafai ona e toe foi i ai. Afai e tuueseina le Matai ua uma ona e ioe e te auuina i ai, o le a e faia e ala i le faaosoosoga a le tiapolo, ma o le a e mulimuli i ana faatonuga ma avea oe ma ana auuina’” (i le *Aooga a Peresitene o le Ekalesia: Iosefa Samita* [2007], 345).
11. Neal A. Maxwell, “All Hell Is Moved” (Brigham Young University devotional, Nov. 8, 1977), 3; speeches.byu.edu.
12. Mataio 5:44.
13. *Aooga a Peresitene o le Ekalesia: Ioane Teila* (2001), 88; tagai foi Mataupu Faavae ma Feagaiga 135:3.
14. Tagai Richard N. Ostling, “Challenging

- Mormonism’s Roots,” *Time*, May 20, 1985, 44.
15. Tagai Ostling, “Challenging Mormonism’s Roots,” 44; tagai foi Gordon B. Hinckley, “Lord, Increase Our Faith,” *Ensign*, Nov. 1987, 52; Neil L. Andersen, “Tofotofoina o lo Outou Faatuatua,” *Liahona*, Nov. 2012, 41.
16. Tagai Richard E. Turley Jr., *Victims: The LDS Church and the Mark Hofmann Case* (1992).
17. Russell M. Nelson, “Truth—and More,” *Ensign*, Jan. 1986, 71.
18. “O Le Mau a Molimau e Toatolu,” Tusi a Mamona.
19. Tagai Iosefa Samita—Talafaasolopito 1:71, manatua; tagai foi Mataupu Faavae ma Feagaiga 76:23.
20. Mataio 7:18, 20.
21. Na saunoa atu Peresitene Henry B. Eyring, e uiga ia i latou e i ai masalosologa: “I lou alofa mo i latou atonu e te filifili ai e taumafai e avatu ia i latou mea o latou fai mai ai. E ono faaosoosoina oe tou te au ma i latou i a latou masalosologa, ma le faamoemoe o le a mafai ona e maua ni faamaoniga po o ni mafaufauga e aveese ai o latou masalosologa. O tagata e i ai masalosologa e masani lava ona mananao e talanoa e uiga i mea latou te manatu o ni mea moni po o ni finauga ua mafua ai o latou masalosologa, ma le tiga tele. . . .  
“E mafai ona ta faia le mea e sili atu pe afai tatou te le nonofo umi i mea o vaai i ai a tatou tamaiti aoga o se faapogai o o latou masalosologa. . . . e le o taoto o latou faafitauli i le mea o latou manatu ua latou vaai i ai; o loo tatou mai i le mea e le oo i ai la latou vaai. . . . O le a tatou faia le mea sili pe afai tatou te vave liliuina le talanoaga i mea o le loto, suiga na o le loto lea e tatalaina mata faaleagaga” (“‘And Thus We See’: Helping a Student in a Moment of Doubt” [address to Church Educational System religious educators, Feb. 5, 1993], 3, 4; si.lds.org).
22. Na saunoa mai Peresitene Gordon B. Hinckley: “I le tele o tausaga ua mavae i le sefulu o ou tausaga sa faaau ai au o se tiakono, o lou tama, lea sa avea ma peresitene o lo matou siteki, na aveina au i lau sauniga perisitua muamua a le siteki. . . . [O le pese amata o le “Viia Le na Fetaiaia ma Ieova.”] Sa latou pepese e uiga i le Perofeta o Iosefa Samita, ma ao latou faia na oo mai i lou loto se faateleina o le alofa ma le talitonuga i le Perofeta maoae o lenei tisipenisione. . . . sa ou iloa i lena taimi, e ala i le mana o le Agaga Paia, o Iosefa Samita e moni lava o se perofeta a le Atua” (“Praise to the Man,” *Tambuli*, Jan. 1984, 1, 2).
23. Thomas S. Monson, “A o Tatou Toe Potopoto Ai,” *Liahona*, Me 2012, 4.
24. “Viia Le na Fetaiaia ma Ieova,” *Viiga*, nu. 15.